



Bentiaraq Ottosen

UPA 2026/74

Atassut

03. Maj 2026

Ulluunerani paaqqinnittarfinni meeqqat minnerit toqqissisimanissaat, atugarissaarnissaallu qanoq qulakkeersinnaaneripput pillugu, apeqquteqaat aallaavigalugu oqallinnissamik siunnersuut.

(Inatsisartunut ilaasortaq Pipaluk Olsen, Demokraatit)

Atassummiit apeqquteqaat aallaavigalugu oqallinnissamik siunnersuut qujassutigaarput.

Qularutissaanngilaq meeqqat mikinerit toqqissisimanissaat atugarissaarnissaallu pingaaruteqarluinnartut. Meeqqat amerlanerit ulluunerani paaqqinnittarfinni inuiaqatigiinni inooqataanermik, attaveqatigiinnermik ilinniarnermillu siullerpaamik misigisaqartarput. Taamaattumik pissusissamisoorpoq suliaasaqarfimmi pitsaassuseq pillugu ingerlaavartumik oqallittarnissarput.

Atassummiilli erseqqissassavarput ulluunerani paaqqinnittarfinni unammilligassat politikkikkut aalajangiinernik amerlanerusunilluunniit oqallinnissamik siunnersuusiortarnerit aqutigalugit taamaallaat aaqqiinartoqarsinnaanngimmat. Unammilligassat annerpaat ilagimmassuk perorsaasutut ilinniarsimasunik amigaaqarneq, sulisut taarseraannerat kiisalu sulisunik attassiinnarniarneq, tamannalu kommunini tamani unammillernartumik inissisimavoq.

Taamaattumik Naalackersuisut isumaqatigaavut pikkorissaanerit, ilinniartitseqqittarnerit, ilinniakkatigut tapersersuinerit kiisalu kommunit akornanni misilittakkanik avitseqatigiittarnerit pingaaruteqartut. Peqatigisaanillu eqqaamassavarput ulluunerani paaqqinnittarfiit ulluinnarni ingerlanneqarnerat kommunit akisussaaffigimmassuk.

Atassut isumaqarpoq kommunit aammalu PI/SPS akornanni suleqatigiinnerup nukittorsarneqarnissaa pitsaasuusoq. Assersuutissaqqippoq Avannaata Kommunia ippassaannannguaq facebook-imini nalunaaruteqarmat isumaqatigiissuteqarluni, ilinniartut praktikkeneri, ilinniartitseqqittarnerit, ingerlaavartumik fag-itigut ineriartortitsineq kiisalu teoriip misilittagaqarnerullu akornanni ataqatigiissumik suleqatigiinneq pitsaanerulersinneqarnissaa anguniarlugu. Pissusissamisoorsinnaassaaq pitsaallunilu kommunit suleqatigiillutik tamanna namminneq ingerlassinnaassappassuk kommunit susassaqrifiisa iluaniimmata.

Tamatuma saniatigut eqqaasitsissutigissavarput akissarsiat atorfeqartitaanermilu atugassarititaasut sulinermik inuussutissarsiuteqartut akornanni isumaqatiginninniarnikkut aalajangersarneqartarmata. Inatsisartut Naalackersuisut peqatigalugit pitsaasunik sinaakkusiinnaapput, kisianni kattuffiit sulinermilu isumaqatigiissuteqartut akisussaaffii



ataqqisariaqarpavut. Taamaattumik sulisunik amigaateqarneq aammalu sulisunik attassiinnarniarneq pillugit aaqqiissutissat aamma NPK-p, SIK-p kiisalu sulisitsisut akornanni suleqatigiinnikkut nassaarineqartariaqarput.

Atassut isumaqarpoq aqqut eqqortoq tassaasoq kommunit, ilinniartinnit akisussaasut aammalu sulinermi isumaqatigiissuteqartartut akornanni suleqatigiinnerup annertusarnissaa, Inatsisartuniit aqutsineq annertunerulersinniarsarinagu. Anguniagaq tassaavoq Nunarput tamaat meeqqat toqqissisimasut, sulisut aalajaatsut aammalu ilinniakkatigut nukittuut.

Qujanaq.